



**REPUBLIKA E SHQIPËRISË
KOMISIONI QENDROR I ZGJEDHJEVE**

Komisioni i Ankimimeve dhe Sanksioneve

Data: 24.04.2023

Nr: 66

Ora: 15:40

VENDIM

**PËR SHQYRTIMIN E KËRKESËS NR. 14, DATË 20.04.2023 TË KOMISIONERIT SHTETËROR TË
ZGJEDHJEVE**

Komisioni i Ankimimeve dhe Sanksioneve në mbledhjen e datës 24.04.2023, me pjesëmarrjen e:

Ilirjan	RUSMALI	-	Relator
Elvin	LAKO	-	Anëtar
Elvis	ÇEFA	-	Anëtar
Koli	BELE	-	Anëtar
Ledio	BRAHO	-	Anëtar

Shqyrtoi çështjen me:

KËRKUES: Komisioneri Shtetëror i Zgjedhjeve

OBJEKT: Vendosja e sanksionit administrativ ndaj zj. Klodiana Aliaj, person përgjegjës për raportimin e veprimtarive publike, në bashkinë Tropojë.



BAZË LIGJORE:

Neni 19, pika 1, shkronja "c" dhe neni 21, pika 1, shkronja "dh" të ligjit nr. 10019, datë 29.12.2008, "Kodi Zgjedhor i Republikës së Shqipërisë", të ndryshuar.

Rrethanat e çështjes:

1. Komisioneri Shtetëror i Zgjedhjeve, në kuadër të procedurave për mbikëqyrjen e procesit të raportimeve për veprimtaritë publike të institucioneve shtetërore, ka konstatuar se bashkia Tropojë nuk ka raportuar një veprimtari publike në ndërfaqen e KQZ-së, për të cilin është administruar denoncimi nr. 156 ID për të cilin pretendohet:
"Emocion i veçantë për mua dhe stafin tim jo vetëm të marrim pjesë por dhe të nderojmë me mirënjohje drejtues e mësimdhënës ndër vite, në 100-vjetorin e shkollës 'Jaho Salihu', në Bujan në Krasniqe të Malsisë së Gjakovës. Jo vetëm Bujani, por e gjithë Tropoja është një trevë e shquar jo vetëm për historinë dhe kulturën e dëshmuar, por për etjen për arsim. Në të gjithë shërbimin tim public kam qenë konsistent dhe do vijoj me përparësi të mbështes edukimin arsimor të rinisë së Tropojës, si një vlerë që garanton të ardhmen tonë. Suksese dhe mirënjohje për të gjithë mësuesit e nxënësit të një shekulli të Bujanit e Tropojës".
2. Mbi këtë bazë, Komisioneri ka nisur hetimin administrativ ndaj zj. Klodiana Aliaj, si person përgjegjës për raportimin e veprimtarive publike në bashkinë Tropojë. Në përfundim të hetimit administrativ, Komisioneri ka arritur në konkluzionin se akiviteti i mësipërm, referuar pikës 1, të nenit 92 të Kodit Zgjedhor, përbën veprimtari publike dhe mbart detyrimin për raportim në ndërfaqen e Komisionit Qendror të Zgjedhjeve.
3. Komisioneri ka vënë në lëvizje KAS-in me anë të një kërkesë, duke kërkuar marrjen e masës administrative me gjobë ndaj personit përgjegjës për raportimin e veprimtarive publike të bashkisë Tropojë në masën 5 000 (pesë mijë) lekë, sikurse parashikohet nga dispozita e nenit 171 pika 1 e Kodit Zgjedhor.

4. KAS-i caktoi me short z. Ilirjan Rusmali relator për shqyrtimin e kërkesës nr. 14, datë 20.04.2023 të Komisionerit dhe në seancën paraprake vendosi pranimin për shqyrtim të kërkesës, duke e caktuar seancën e shqyrtimit më 24.04.2023, ora 15:40.
5. Seanca e datës 24.04.2023 u zhvillua me praninë e Sekretarit të Përgjithshëm të KQZ-së, si përfaqësues i Komisionerit Shtetëror të Zgjedhjeve dhe të specialistëve të administratës së KQZ-së. Personi përgjegjës për raportimin e veprimtarive publike të Bashkisë Tropojë i njoftuar rregullisht, nuk u paraqit në seancën e shqyrtimit.
6. KAS-i mori në shqyrtim dhe administroi:
 - Kërkesën nr. 14, datë 20.04.2023 të Komisionerit;
 - Vendimin e Komisionerit nr. 388, datë 19.04.2023 “Për shqyrtimin administrativ të denoncimit nr. 156, të Koalicionit për Reforma, Integrim dhe Institucione të Konsoliduara ndaj personit përgjegjës në bashkinë Tropojë, për shkelje administrative, për zgjedhjet për organet e qeverisjes vendore të datës 14 Maj 2023”.

Në përfundim të shqyrtimit administrativ dhe të vlerësimit të provave dhe pretendimeve përfundimtare,

KAS-i konstaton:

1. Shkelja e konstatuar nga Komisioneri Shtetëror i Zgjedhjeve, për të cilën kërkon sanksion administrativ ndaj zj. Klodiana Aliaj, si person përgjegjës për raportimin e veprimtarive publike ka në fokus zhvillimin e një veprimtarie publike të zhvilluar, e cila nuk është raportuar në KQZ.
2. Referuar nenit 92, pikës 1 të Kodit Zgjedhor, *“Institucionet publike, qendrore dhe vendore, si dhe agjencitë dhe/ose ndërmarrjet shtetërore, janë të detyruara të raportojnë në KQZ të gjitha veprimtaritë me karakter publik që planifikojnë të zhvillojnë në periudhën katër muaj para datës së zgjedhjeve deri ditën e zgjedhjeve. Formojnë veprimtari publike të gjitha veprimtaritë që janë të hapura për pjesëmarrjen e publikut apo të medias, si dhe ato që*

kanë në agjendë informimin, në periudhën katër muaj para datës së zgjedhjeve deri ditën e zgjedhjeve, e publikut rreth tyre”.

3. Nga provat e administruara në hetimin administrativ të kryer nga Komisioneri Shtetëror i Zgjedhjeve, rezulton se në rastin konkret veprimtaria ishte e hapur dhe kishte pjesëmarrje të publikut (banorëve të zonës dhe mësues e nxënës të shkollës).
4. Komisioneri ka hetuar dhe ka identifikuar drejt përgjegjësinë e zj. Klodiana Aliaj, referuar nenit 92, pika 3 të Kodit Zgjedhor, **“Raportimi është përgjegjësi personale e personit përgjegjës për drejtimin administrativ të institucioneve publike, agjencive dhe ndërmarrjeve shtetërore (sekretarit të përgjithshëm të institucionit ose, sipas rastit, e drejtorit të përgjithshëm apo drejtorit ekzekutiv). Raportimi duhet të kryhet jo më vonë se pesë ditë përpara afatit të planifikuar për zhvillimin e veprimtarisë.”**

Personi përgjegjës për raportimin e veprimtarisë publike të zhvilluar është zj. Klodiana Aliaj, si “person i ngarkuar me detyra”, sipas përcaktimit të pikës 1 të nenit 171 të Kodit Zgjedhor, për shkak se është personi i caktuar përgjegjës për raportimin e veprimtarive publike.

PËR KËTO ARSYE:

Bazuar në nenin 21, pika 1, shkronja ‘dh’, të ligjit nr. 10019, datë 29.12.2008, “Kodi Zgjedhor i Republikës së Shqipërisë”, të ndryshuar, Komisioni i Ankimeve dhe Sanksioneve

V E N D O S I:

1. Pranimin e kërkesës së Komisionerit për vendosjen e sanksionit administrativ ndaj zj. Klodiana Aliaj, person përgjegjës për raportimin në bashkinë Tropojë.
2. Vendosjen e sanksionit administrativ ndaj zj. Klodiana Aliaj, në masën 5 000 (pesë mijë) Lekë, sipas nenit 171, pika 1, të ligjit 10019, datë 29.12.2008 “Kodi Zgjedhor i Republikës së Shqipërisë, i ndryshuar”.

3. Ky vendim hyn në fuqi menjëherë dhe publikohet në faqen zyrtare të Komisionit Qendror të Zgjedhjeve.
4. Kundër këtij vendimi mund të bëhet ankim në Gjykatën Administrative të Shkallës së Parë Tiranë, brenda 45 ditëve nga shpallja e tij.

Ilirjan	RUSMALI	-	Relator
Elvin	LAKO	-	Anëtar
Elvis	ÇEFA	-	Anëtar
Koli	BELE	-	Anëtar
Ledio	BRAHO	-	Anëtar